

田亭草卷十六

戶部右侍郎陽山莊公墓誌銘

誥封魏國太夫人童氏墓誌銘



廣西慶遠府知府桂原張公暨配封宜人黃氏墓

誌銘

處士黃公暨配張碩人墓誌銘

國子監典籍封中憲大夫廣東按察司副使秀林

陳公墓誌銘

河南按察司副使瑞山陳公暨配封孺人謝氏墓

誌銘

安溪邑庠生滌渠林公暨配吳孺人墓誌銘

鄉進士鑑泉留公暨配黃孺人墓誌銘

左州守文源楊公暨配翁宜人墓誌銘

封承德郎工部主事纓泉蔡公墓誌銘

郡庠生騰江田君暨配王孺人墓誌銘

通議大夫戶部右侍郎陽山莊公墓誌銘

少司徒陽山莊公之里居也臺使者連章尉薦蘄
公爲朝廊重然而公高卧衡荆泊如也與里中四五
君子結登臨社而不佞撰杖屨陪焉每探竒陟嶽賦
詩紀遊公特饒濟勝具旁觀者謂壽且未涯而遽以
萬曆甲辰十二月二十四日巳時卒距其生嘉靖丁
亥五月二十三日辰時享壽七十有八中丞直指使
以聞上篤念耆碩俞禮部議予祭葬如令甲今公
子光祿君懋儀等卜以戊申年十二月十一日奉公
柩葬于南安縣黃石山之原先期請銘於不佞而公

仲子參知君懋華手爲狀纍纍數千言詳且核不佞
烏敢辭按狀莊爲吾郡甲族唐光啓中自河南固始
徙郡之永春桃源里至宋慶元中有古山公者與少
師忠敏公同徙居郡城復自郡城徙晉江之青陽山
麓傳七世爲無逸公宜無逸公生新會司訓公安期
司訓公生封按察僉事公偁則公父也新會公按察
公俱以公貴贈通奉大夫河南左布政使而新會公
配屈夫人封按察公配楊夫人繼陳太夫人俱贈封
如今號楊夫人孕公時按察公夢巨人拊其背曰天
帝畀若佳兒亢若宗中庸國家將興二語其名也以
爲公生而名之曰國禎長字君祉公幼而岐嶷按察
公課之嚴甚故其學蚤成聲奕奕于郡邑間嘉靖庚
子試棘闈已見錄而束於額弗竟薦直指使王公瑛
雅奇公特召與鹿鳴宴席時公年甫十四耳越己酉
乃薦于鄉壬戌薦南宮第九人以進士丙科授浙江
會稽令公至則慨然自許曰會稽一錢今日之令當
與昔日之守金矣飭諸賦長毋或以羨金嘗我有三
尺在不爾貸諸賦長錯愕相顧罔敢低昂其手署中
負一蔬一茗必準市直即上官過賓饋餉取足供匕
筋而已於厨傳無所飾人人知公廉不爲訝民以訟

至者出數語立剖竟手傳爰書以示兩造願息者聽
椽以下無從得一錢輒託詞來去公咲謂無庸也第
令若輩守簿書椽更牒博半通綸胥徒安坐受餽無
譴累吾乃為若德矣皆泥首謝山陰令闕上官檄公
兼治之已有代者而遭喪不果來公復兼治之先後
幾二載若分身而應未嘗有留牘也公持法平恕其
於死獄百方求生久枉繫者遇公輒得釋旁郡邑有
滯獄必請於當路下公讞決所平反無慮數十然非
專務縱舍以博長厚名有諸四十二者睚眦殺人公
抵之罪時其從子宮案方顯重所轉屬營脫百端卒
不為撓直指南海龐公尚鵬方銳意行賦役條鞭法
衆相仗莫有任者公精心致行之稽覈審調劑平邑
民懼呼稱便龐公遂著為令推之全浙今是法遍海
內顛若畫一而不知其自公始也公以治行卓異徵
其邑大姓苦賦役為公所覆露者操兼金重篋為別
公愕然曰視劉寬一錢不已重乎諸別者灑涕而去
相與立祠祀公公至闕下當 穆廟改元選授戶科
給事中時 上方有詔幸舊邸禮臣爭之不能得公
䟽言 聖明馭極四方顛顛望治而遽以游宴聞漸
不可長且使懷忠願獻者自生疑阻尤非清時美事

語特剴切疏入報聞然識者謂得古諍臣防微之指
時留都參贊及督儲大卿缺廷推舊臣郭宗臯游震
得公抗言宗臯總督宣大必犯邊殺鹵無算總兵張
達副總兵林椿殲焉震得撫閩懦縮無策島夷陷郡
邑者數處雖廢謫未盡其辜柰何遽從叙錄疏入弗
棟事者意矣其秋大入破州縣詔廷臣集議防守
方畧公條議上如作士氣重將權久邊任處屬招
携叛諸事於廷議中最詳確而所謂慎行邊者謂唐
裴度視師淮蔡宋韓范經畧西夏古行邊大臣至重
已頃者侍郎遲鳳翔叨膺重寄寸籌莫展日與督臣

劉燾等置酒高會自知負國姑引疾去其可以謝天
下然非直某罪也行邊之任例屬樞貳承遣者循次
探囊闚觚者先期投謁推擇弗慎誰執其咎當事大
臣滋不悅而太宰復中譏厚忌公甫遷右工科隨出
為浙江按察司僉事公嘖然曰淮陽非薄禁閹何必
久留吾終不能枉吾尋以營直尺矣自是敷歷藩臬
惟兩入江右稱善地而播遷滇粵間者四最後以服
除赴銓乃得左轄河南公視之如飄萍無棟擇念也
公自應制舉輒已攻古文詞又壻于遵岩王先生慎
中特經指授所為文確應古法且雅負人倫鑑故其

視學江右也每行部既已獎淳樸抑浮競評隲藝文
暇輒進諸生就所質爲之詰難敷析不別標門戶立
擲柄人人憬醒融洽今諸縉紳列休案爲縣官用者
多公所甄士也其分憲西浙總憲東粵皆從事棘闈
直指使皆倚公爲衡鑑浙中錄文又大半出公手以
雅淳復古稱而先是令會稽日嘗與校省試所薦達
多知名士連得雋南宮又嘗試邑諸生所首拔爲戊
辰大魁羅君萬化人咸以水鑑推重云公嘗言生平
得力只在一會稽令即錢穀軍旅刑名嘗從德性中
陶鍊不敢視爲瓊瑣浙西當南北孔道冠蓋絡繹公

造請不避寒暑而共具不飾則一如在會稽特乃至
汰墨吏討軍實繩豪強弭奸慝持法視令差嚴曰此
法官職也初副憲廣西治水寧永寧故古田縣自平
韋銀豹後改爲州者也公當新造之會築城垣繕館
舍集流移孳孳爲永賴計而銀豹族孽韋狼要者復
糾永福陽朔徭以叛公生購得韋酋餘黨猶負嶠屯
結會督府受命討懷遠公周旋行間議賈其餘勁勦
陽朔而洛容又告變公曰此破竹勢也遂移師勦之
以及永寧永福柳城諸崗悉平督府上公功賜金幣
增歲俸者再河南會城周邸在焉周之天潢仰食藩

司者數累萬值歲侵所司不時給數群聚而譁公至則為請它積貯給之而徐議補與諸長吏約凡徵輸第其急緩給諸宗人第其貧富先後期會不爽又嚴飭胥史毋得侵牟其間諸宗人手額頌使君生我矣逾歲大侵饑莩流移載路公倣趙閱道荒政法選丞倅分地畀之屬長吏督率之時察其勤惰稱否為最殿諸郡邑吏咸竭蹶供事而兩臺疏請發臨德倉又請改折漕糧三歲皆公籌畫也民藉以全活者甚衆潞王當之國上命所司拓衛輝郡城廣其邸址而中貴人蒞焉公所為裁度經費節縮浮冗斤斤無少假貸中貴人誠其下曰是故給事中巡視監局厥厯有風稜者姑聽之事以就緒而民亦不告敝公積望久自河南遷都察院右副都御史巡撫江西江西歲比中水前撫臣請改折漕糧三之一不報公援河南事為請疏詞懇惻上覽之心動遂報可明年復大旱公下所司議括贖緩借商稅發庾廩分部賑給乃疏言凶歲為虐視往歲特甚此時議賑則難遍議蠲則虛名惟全折南北漕糧通計可百餘萬石官無所損而民省輦輸計無便於此者疏入復報可公又下令弛刑緩征停不急之役革浮靡之費長吏而下

有弗率者亟按以法閭里間霍然有瘳矣會安慶贛
 州有大盜稱亂先後與其帥合策捕之事聞賜金幣
 已乃遷南京刑部右侍郎甫受代復遷戶部右侍郎
 未上而奉楊太夫人諱奔歸矣公器度端凝貌寬和
 而衷嚴整有屹然不可奪者明州袁相君怙主知氣
 焰熾甚其外戚管甲借郵券將之京道會稽厚索於
 東關丞不如意箠之幾死公捕繫之獄諸上官大駭
 張直指科相君客也急檄郡中出繫者伴得僦輕舟
 遁去相君聞大恚奔公甚力然竟以輿議屈故事直
 指使典棘闈者得遴士入棘比罪試則檄充弟子員
 當公之督學也張直指簡沿例以檄至公毅然曰混
 庖俎而開俸膏誰可訓耶未罷之諸藩臬承風指為
 言竟不聽公之直已守道類如此乃至借譽養交以
 營善地圖羨遷公恥之若衣冠塗炭矣家居時時對
 客所頻過從惟一二故人相厚善者坐客不常滿而
 尊常不空間與客對奕曰心手俱閒時聊有所用耳
 人有善疑借恐後或有非意之加恬然受之不復掛
 胸臆每謂昔人理遣情恕兩言終身誦之可也家故
 青陽里人有以質成至者輒卻之曰吾不敢侵長吏
 權宗祠稍有圯壞皇皇葺治之歲時伏蜡率宗之子

孫敬共祀事每與人語好稱引國家典制往哲即
行誼祖先以來積功累行之跡旁及今昔人情善敗
隆污之變聽者聳然感動當路諸公及門者未嘗峻
拒諷利病未嘗不具以告里黨有負枉不能直者語
次間爲直之然絕不令其人知也公爲文喜典重深
厚而厭鉤棘爲詩喜春容雅渾而薄纖巧大都得遵
岩先生之型治爲多然常謂仕宦自有職業不宜耽
雕蟲技以致妨曠四方慕而乞言者彊而後應即應
之亦不復存稿今其存者自奏疏東牘外百不一二
惟與吾儕遊有吟稿合梓傳郡中而公詩尤爲人羨
誦云公子男三長懋儀光祿寺監事次懋華萬曆己
丑進士次懋聲乙酉舉人先公卒云云公墓負坤揖
艮諸名山四望映帶爲公所自卜築余儕嘗即茲丘
觴公公亦觴余儕交相樂也每風清日霽公之樂復
與子姓戚鄰偕不至星雍門之悲雪孟嘗之涕蓋於
死生之際達矣然其不隨死而亡者在也銘曰莊氏
之先遐有令軌豈乏嗣興公復其始筮仕壯邑仁風
馴雉入司諫垣朴忠自矢上嬰逆鱗中維國是一士
諤諤絳灌所擠乃踐外服雍容迤邐寧我集枯母
羶蟻南北東西崎嶇如砥駿望英聲斗崇岳峙晉撫

名邦召伯是似弘濟時艱恩覃四履歛厥餘波為德
黨里桂樹青莎江離薜芷朝夕徜徉超脫塵滓雖則
林壑羽儀具美黃石之原公所徙倚埋玉藏舟晶光
夜起勒銘玄堂遺麻未已

誥封魏國太夫人童氏墓誌銘

隆慶六年魏國公徐公邦瑞嗣父爵會 聖天子即
位上 兩宮徽號推恩臣庶俾獲貶榮所生公奉
恩詔封母童氏為魏國太夫人太夫人象翟麟衣環
諸孫子膝下歲舉觴稱壽閱一紀于茲矣萬曆癸未
四月二十四日以疾終於正寢公䟽請于朝曰臣邦
瑞累世受國恩自惟謏劣未能圖報稱萬一猶徵
陛下寵靈賁及臣母至厚幸也今臣母不幸先朝露
臣不勝烏鳥私情願 陛下終始大造錫之卹典以
為存歿光 上俞予之公卜以次年九月七日扶太

夫人樞詣鍾山賜地啓其先太保公窆合厝焉禮也
 先期謁黃生請銘黃生手其狀讀焉出奉常許先生
 筆太夫人懿行具是矣公且拜且言縷縷述弗能既
 也徐氏自中山王佐 高皇帝定天下功比蕭曹又
 托肺附親也尊寵於廷臣無兩受河山世誓傳子及
 孫 祖宗時南顧旬服注意勲戚重臣特以完鑰寄
 畀之徐氏傳至太保公閱歷 三朝肩留鑰者凡五
 十餘載靖共朝夕好賢下士最有譽于縉紳間大夫
 人翼襄內政良有裨焉太保公性嚴敕壺以內無嬌
 色媒容旦出理留務昕夕酬應賓客太夫人婉婉承
 之咸當意指又隨宜擘畫若迎刃導窾有餘地也自
 舉今國公稍長就外傳矣歸據几作伊吾聲太夫人
 就眎曰吾不能知書第聞先中山王受券語云高而
 不危滿而不溢此 奎章宸翰也家長老誦之寶若
 著龜即充棟汗牛窮日夜繙閱奚加此兩言焉小子
 識之矣其通達知大體如此公襲爵稱 天子上公
 已復完留鑰如故事太夫人輒洒然變色以寵祿太
 盛為虞間斷斷語之曰夫晝夜寒暑遞往迭更以
 祖宗豐芑舊都自太保公而上三世百餘年完其鑰
 矣爾復嗣膺斯寄也良駒負重猶慮蹉跌吾竊用朝

夕懼比公釋留務日婆娑北堂前則太夫人適然色
喜矣性素澹泊恒屏華崇約為諸婦子先待宗媼惠
愛備至無弗交口頌者每春秋記事輒前期戒公曰
若奉 天子命展 陵祀矧徐氏宗祧乎尚祓濯乃
心母怠蓋筐筥錡釜蘋蘩胎骼均為預庀而躬營也
疾亟呼厥子勉以恪慎忠勤用答國恩先前列絕口
不及家事良違於忠孝大節哉余與徐公游睹其敦
龐醇謹雅有父祖風母太夫人之教也太夫人生正
德庚午八月初三日距其卒之年享壽七十有四世
為天津茂族父先祖衛指揮使母蔣氏子二長即魏
國公邦瑞娶黔國公沐某女銘曰瘠土民思沃土民
佚賢母之云勤其國恤歎也奉之光葆祿秩赫矣中
山孫子奕奕居寵惟畏貂蟬逢掖厥有母儀閨闈為
式詒穀儲庥豐培崇植迺昌胤嗣用耀宗祏軒軒既
遙栝棧遺澤 皇綸炳蔚賁于窀穸刊石垂徽永世
無斁

廣西慶遠府知府桂原張公暨配封宜人黃氏

墓誌銘

慶遠守桂原張公右都御史贈太子少保謚襄惠公
峯公之家嗣也襄惠公以氣節功業為一代名臣其
勳猷在兩粵最顯公守慶遠復卓然著賢能稱人謂
襄惠公有肖子蓋不以名位為輕重云初襄惠公年
四十未子也時方督學廣右而署中叢桂盛開堂祀
芬郁觀者瑞之越歲壬辰遂產公焉襄惠公劇喜名
公曰桂即而公自就傅時輒露警穎矣時以議禮躡
進者曰張桂縉紳間目為儉邪公已聞知之輒請于

襄惠公曰兒名非佳願大人爲易名襄惠公听然失
咲易其名曰宓說具載文集中既冠字之曰仲初蓋
申慕古意云襄惠公節鎮兩粵秩滿任子而公爲太
學生比開府楚沅卒于軍時公甫有室耳而生母黃
宜人亦以是年卒公毀不滅性戚而能易事嫡母陳
夫人孝謹甚課督二弟靳相與不隕先業宗黨中嘖
嘖有譽矣免喪十餘載乃始謁選銓部得前軍都督
府都事尋轉右府參軍諸貴胄官長安者率鮮衣怒
馬相炫耀時時過從浮白呼六博爲懽而已公獨衣
次時衣乘一欵段入公署歸則倚戶讀書一蒼頭給

爨蕭然寒素士也居七載出守慶遠候賊正窮復

雜居南丹東蘭那地三州皆土酋典之往時郡將

多墨賄散法與爲市那地蠶食吾土者二十二邕東

蘭沒我都亮而河池州里額重存三之一乃南丹猶

侵盜不厭也公至詢諸故府則憤然嘆曰土酋獷極

矣即金如粟馬如羊可隱忍假貸乎已而三土酋伏

謁堦下果庭實盈篚也公遊麾之出於是郡士氓咸

頌公似張安定不第諸豪酋齟服矣公吏事最精務

在疎文罔崇實政準稅賦之美嚴官市之禁百城吏

靡弗灑然奉法者每朔望視學念先公過化遺蹟在

焉則常訂為課程校諸士甲乙之建尊經閣備文廟
樂舞飭旁邑黌舍一時人文燁然改觀蒞諸徭嚴而
有恩曩時竊伏菁莪攻剽商民者一切駭喙削跡自
公在事數年四封按堵卧戟生耳卧犬生甕矣諸目
兵多虛糜歲饒公詳核名籍汰濫冒歲所省若干緡
府江之後土酋赴徵調所過搔擾獨至公境上輒抑
首弭耳無敢譁者公威信籍甚部中一日下片札令
三州迤所侵地鐫以王法導以悔禍凜若相如諭蜀
檄也諸酋揣公不可嘗爭輦金幣資關說公持益力
酋乃度疆里奉圖籍以獻蓋襄惠公折衝尊俎能令
莫酋欵闕面縛歸我二都四尚公視先烈奚忝焉然
而關說弗售者中公矣會大計當得調謁臺使者于
柳州郡士民號呼攀留不能得公歸次潯州一夕暴
卒潯之民群而哭公曰此故制府張公子也慶遠之
民追而哭公曰天乎胡奪我父母也公蓋不以家累
自隨筑筑二蒼頭將廣柳車抵里囊如懸磬獨故時
衣在耳謂襄惠公有肖子諒哉諒哉嗟乎以襄惠公
正氣勁節易名未稱士大夫迄今嘆惋謂柄臣忌公
者實為之乃公竟以夫歿天固亦靡定耶公配黃宜
人大參晉江黃公潤女大參公歷宦清約襄惠公雅

慕之因遂訂婚而宜人歸于公以其素風偕至也婉
懋孝共其在宜陽守儉樸勤拮据不以既貴改克佐
公茹藥之操比公歿而撫教諸孤肅焉壹範蓋詩所
稱女士云公先系出曲江文獻公弟九臯公派也其
徙惠安則自刺史公瀾始公曾祖諱綸爲桐鄉令祖
諱慎爲英德令父襄惠公諱岳桐鄉英德兩公皆以
襄惠公貴贈通議大夫都察院右副都御史公卒萬
曆甲戌得歲四十有三黃宜人得歲六十有三子男
五遂連近迪述遂等卜吉于其邑龍頭山之原將以
今萬曆庚子十一月二十日奉公與宜人合葬於邑

銘於余蓋吾鄉宦粵中者爲余言云粵中人思襄惠
公不置今柳州德慶廟貌儼然逮慶遠公至猶襄惠
在睹也而余嘗與慶遠公同朝諗公行履樂爲之銘
銘曰江左貴游世藉閥閱紫囊文袴重乃折節梁公
撫魏去有餘思參軍弗類民毀父祠世祿之家鮮克
由禮沃土民汰頽波瀾瀾公席世資亦念世德迪軌
遵途循繩守墨內恪官評外協民譽赫赫先猷厥後
永裕懿哉閨範亦佐象賢並闡徽猷勒詞幽埏

處士黃公暨配張碩人墓誌銘

安平處士鍾愛黃公諱穎字文秀生弘治丙辰三月

十日卒嘉靖丙申三月十三日得歲四十有一配張

碩人生弘治壬戌十月十六日卒嘉靖戊戌十月十

七日得歲三十有九有子錫舉嘉靖甲子鄉試仕為

河南鄧州守淮府左長史當公歿時左史君甫三齡

耳易箒之辰指其孤錫屬從子鑄曰以弱息累汝公

配張碩人則時時置孤懷抱泣曰未亡人朝不及夕

恃一縷血胤在天其或者悔禍以而亢宗乎顧重越

二歲而張碩人又歿左史君箴箴子立賴其從兄鑄

田

女子文三

與從嫂高覆翼撕誨之又時述先德先志督厲之君
自幼感情迄用表豎今所狀皆剽聞語又皆質語也
狀曰安平黃氏先爲河南光州固始人晉亂避地僑
閩曰岸公者遷於莆以桂州刺史顯唐季衣冠繩連
不衰迄元至正間而千一公松始去莆遷泉去郡城
遷安平鎮傳子良輔孫元嗣元嗣有子六長逸心生
也旭生活齋公士堅是爲公父公有兄三伯兄齡嫡
母吳出叔兄顛繼母洪出公與仲兄碩出自生母張
恬齋公舉公晚愛之特甚公以故自號鍾愛識劬勞
念罔極也公生二年而恬齋公捐館舍與母張仲兄
頽形影相依仲氏賈游郡國公免孩即挺身佐之自
傷孤孽睹仲氏所爲勤嗇狀亦強自努力卒歲廼一
歸省久之累千金公亦任家仲氏廼稍分與羸子錢
聽自爲買而公性本儻宕居恒謂計然陶朱瑣瑣機
利白圭忍嗜慾節服食徒自苦無益遂廼鮮衣怒馬
從閭里俠少年游放浪佳山水間諸所與奕戲馳逐
者一杯勺肝膽爲盡終不忍有所逆億有名假貸輒
傾索周之亦不復質券責償坐是資斧罄矣顧其於
任放輕施自如公性雖曠達然莊事二母三兄孝友
篤摯遂遂中禮度即受譙呵靡愠色始與諸弟折箸

適支縣絕無纖介望曰母命也最難得者兄弟耳其
後生母張殞繼母洪暨異母兄相繼殞公哀慕摧毀
如一仲兄碩患苦胤樹卒構狂易疾所捐擲旁出不
貲或謂公母弟一貧至是胡拙自爲計而徒供它族
外府公泫然曰徼祖宗在天之靈倘不重困吾兄而
柰何忍有它覲叔兄顛嫂氏寢疾議割腴田若干佐
大宗祀則從史其嗣鑰俾極意將順卒成義舉爲族
人倡公生平慷慨扶義類如此晚年廢居彌困產益
落悒悒自失用是疾弗起然歿時情神暇豫所屬意
託其孤錫者卒克慰公地下人謂公大事不懈塗云
公先娶陳故黎浦令佐從女聰不忘歲年二十有二
卒繼娶張碩人張振西右族碩人歸而不逮尊章且
苦乏匱也躬椎布操作卒瘞拮据匪懈公藉以忘困
恣春裡祀脯飽酒漿之薦必竭虔必備物公藉以忘
勞公棄賓客所遺陳碩人女一碩人子女二家徒四
壁立孺人拊其藐諸孤均鳴鳩愛而歲治酒醑佐家
獨身作劇旦暮號顛聞者爲潛然淚下盖免喪甫數
月孺人竟用毀瘁卒左史君卜吉于南安縣三十五
都南山之原謁余請銘詞酸楚甚也夫鍾愛公濶畧
細行慎大德張碩人固窮克相卒以死勤藉今天假

之年必且式穀嗣人而躬食報迺後先未去殀以歿天之於善人其何如哉然今日天定矣左史君之悲亦藉以少塞也乎初左史之從兄鑊葬其父母蓮園干支形家言福徵在季公衆中自喜曰是歲吾兒錫生殆其祥乎張碩人嘗以公事謁族不自得歸而夢門高類容戟者表樹於桎旦對家人且語且泣一孤兒安樹表蓋左史君所聞於從兄鑊者如此銘曰卜耶夢耶喜耶悲耶厥徵匪窮厥應則遐載德儂美以昌于而家詎云所持者狹而所欲者奢

國子監典籍封中憲大夫廣東按察司副使秀林陳公墓誌銘

秀林陳公諱安字叔勉以國子先生致其事歸其稱大夫則厥子參知君誠甫官學憲奏最勲綸命也公業胡氏春秋旁及公穀左氏已又博極百家諸史書親席研夜映燭燭即盛暑隆寒弗勸爲文與衍連拔力掃浮靡學使者賞識之食餼于庠矣累試棘闈弗售晚乃應歲薦謁銓爲靖江司訓是時參知君已魁閩省公尋遭外艱里居而參知君成進士比服除或謂公可釋寒氊就榮養者公荅曰英才樂育愧涼德

無以戡耳其何敢薄寒糴弗屑復謁銓得司訓初州
未幾遷尤溪學諭居三載遷台州郡學授所至諸人
士感頌而請勒去思碑台爲肖像生祠又祀諸名宦
尤稱瑰異事云比遷典籍國學公曰吾老矣都門餞
送可無待矣遂騰牘乞休竟得請蓋家居凡五載而
卒卒之年屬參知君自粵東旋子舍裴迴膝下終獲
侍湯藥奉含歛今卜以萬曆壬寅四月初十日畢公
襄事而謁黃生請銘黃生夙慕公質行乃參知君狀
又皆質語也公性樸茂經生時筠簪布袍履敝爲穿
食重蔬藿二簋非燕饗不啖寸縷有諸葛公澹泊之
志事父涪州公暨母顧孺人柔聲怡色問寢膳最得
二人懽事二伯兄如父執親喪號慟欲絕水漿不入
口者三日餽粥者三月斷葷酒者三年有徐積終慕
之孝家故號素封絕不屑問家人產而好振人之急
受餼于庠輒推給親知匱乏者有友趙生陷倭難被
質要贖公捐貲贖以還趙感泣力營償金公對之泣
辭弗受有范少伯好施之誼嘗讀書北地家園隣有
醜酒桀少年踣公廬兒幾殆公弗爲較第徐諭之曰
若以後母使酒其人顏汗心折比既貴復有子矣冲
挹彌甚偃僂循墻無纖毫揚詡態居庭惡聲不及犬

馬獨嚴飭諸子姓弟姪凜然靡犯有萬石君太丘長
之風先後擁臯比臨黌校者四皆肅範章軌動諸士
課業至其飭廟泮立校舍咸捐俸營之而台號材數
公所陶鑄獨多所至人擬之胡瑗故去思不替焉乃
參知君恪奉庭訓克有聲于中外隆積宏發奚必自
躬於戲如公者足銘已墓在晉江縣三都碕石山之
原參知君營二壙奉厝公于左而虛其右爲公配黃
太恭人壽藏初公夢壽塋卜於虎竒石爲參知君言
之今所庀壤有石瑰如跣於虎方厥名與形實符公
夢吉徵見矣而公父墳在秀林山公別號志思也茲
墳咫尺相望良足慰公地下銘曰漢重師儒州郡辟
舉起家博士召對當宁虎觀石渠旋登崇廡三途既
分資格懸阻明經通籍皓首黌序瓊硤雜陳驥駕共
圉雖有英持蓄縮靡豎公應斯選卓邁儔侶夙載純
白獨標繩矩絳帳生春園橋化雨拔跡沉淪漸躋廊
廡逝矣素尚言歸衡宇名協旦評神棲玄圃亦有詰
胤克振令緒赫爾恩華永育堂介公世系子孫詳列
于左

河南按察司副使瑞山陳公暨配封孺人謝氏

墓誌銘

自余爲諸生時則識憲副瑞山公公之歿也二十餘
年往矣其子亨衷等卜以萬曆十五年九月葬公于
南安縣四都蘇山之原先期介其從兄僉憲君謁余
請曰某輩無似惟是先大人宅兆蓋靡歲不怔營矣
顧卜而疑疑而又卜遂遭延至今乃始克襄事也不
孝之罪其奚所逃願微惠一言庶幾自解者余唯唯
按狀公諱儲秀字舜弼別號瑞山世爲泉之晉江人
公七世祖公輔始卜居南安五都梅溪山四傳而爲

公曾祖賢英生恕恕生東溪公樂邑庠廩生是為公
 父娶賴氏生公繼娶蔡氏生維材比公貴封東溪公
 監察御史母賴氏蔡氏贈封皆孺人公自幼警敏時
 東溪公已久困場屋則撫公喜曰吾志有託矣無用
 老一經為遂棄舉子業弗治而一意課公學公習經
 生言輒已屈其曹偶仍束贄築館就郡城講藝焉公
 文名日益起辛卯舉鄉薦壬辰遂成進士筮仕行人
 已選雲南道監察御史已外轉河南按察司副使董
 河道官階並再轉耳而踐敷中外者蓋二十餘年氣
 嶽嶽弗為阿妍態也為行人嘗奉使魯藩藩王慕公

名厚薦贈為交懽地公峻却弗受藩王以此益重公
 其為御史按部也兩俱在粵中始清戎兩粵公謂閩
 左之後尺藉功令具在若第影捕蔓引如冒筍亂魚
 畢弋亂鳥非作民父母心乃班令于所司俾覈實督
 發諸屬籍絕者勿濫逮迄竣事上得當以報司馬而
 下以綏粵民粵中交口頌之尋居封公喪既免喪還
 朝會東粵按臣當得代臺議會曰是孰逾清戎君者
 公用是持斧之東粵公茲往也如夷遠驟驥矣稔民
 情利病政治孰便孰否一一罷行之咸中要窾時安
 南方阻兵不庭議撫勦者紛拏靡一公與總督尚書

毛公伯温相機宜宣威德 首欵闕請咎竟降號輸
貢于朝 天子嘉其功能特賚寶鏹焉公風裁峭聳
所至不爲假貸而獨折節好士暇時遴諸雋茂與程
藝講德士多感奮者如龐公尚鵬殷公從儉皆出公
甄拔先後董閩中節鉞所以尉藉其家甚備云公積
資久逮自粵東報命聲奕奕振也序當內擢而屬分
宜修憾於貴溪方引繩批根所厚善者公夙爲貴溪
獎識忌者仄目矣以故竟擠公外轉公曰外憲內臺
等耳豈必乘驄攬轡乃克肅風稜哉至則樹標振厲
約飭諸屬吏斤斤焉束于法程即鉅猾豪右弗得撓
公三尺人或陰誚公曰是矯矯者故直指使乎公微
聞之不爲動管河判官某苛而墨于御史大夫有連
也大夫以屬公公廉得其不法狀嘆曰夫固蔓附而
鷹攫者藉令上下相蒙以比一墨吏柰法紀何即檄
下逐之其彊直自遂類如此御史大夫啣公甚而先
是公在臺時曾以他事迂御史大夫意適大計拾遺
公遂爲言者所中失官歸歸之日橐無厚裝椽屋重
蔽風雨耳公怡然意得與朋舊日相過從而以其半
居梅溪課蒼頭藝田園乃澹澹稱饒歲益斥旁產矣
公自負高抗又山居采茹足自給於郡邑絕無所造

請郡邑大夫恒式廬禮之即閭里亦傾慕焉公配謝
孺人爲晉江南廳望族性嫵婉善佐公內政蓋自公
携篋力學什九在外比驅馳官籍未嘗揭家累自隨
而孺人黽勉養舅姑飭子弟御諸臧獲井井然秩于
理也以故公之學與仕得無內顧憂公有側室二孺
人咸憐愛之曰俾胤嗣日蕃以昌夫宗吾志願足矣
孺人始有樛木之風哉公生云云子男六人當公之
將歿諸子多纍然幼也公恬無它慮獨語長子亨衷
曰吾所不瞑目者三祠宇未建家譜未緝義田未創
也吾意有待耳不謂今遽已矣畢吾志者茲且嗣興
僉憲君所爲狀縷縷焉述之靳不負公心許也
公於易箒之際而意氣超倬不憤憤若此可不爲難
哉銘曰車旣騁矣而扼弗前玉旣售矣中復棄捐其
雄姿逸態素魄清妍猶昂藏廣野而瑩灼藍田誰則
似之維公亦然我勒其銘賁于重泉

安溪邑庠生滌渠林公暨配吳孺人合葬墓誌

銘

社友司理林君將葬其二親手次行畧屬宗弟侍御君秉漢狀之而謁黃生請曰嗟哉雨化之不孝也雨化角州而喪吾父壯而喪吾母遭延迄今乃始克襄事也念所濡忍遲迴者有待耳顧竊祿中外竟未獲徼一命貴九京願足下銘之庶藉手追罪萬一者余謂古人願子善養不願祿養君歷宦久雅素若儒生斤斤守先世田廬耳即以如生事之古所稱善養奚加焉第藉手慰二親可矣乃按狀誌之林之先世自

金紫公四世孫敬宗隱居于泉安溪之龍蟠敬宗之子四仕泰仕由仕政仕灼由以洪武間舉人才授池州大通巡檢後與政並失其傳仕泰子源孫遷邑之虎坵仕灼遷漳之長泰林墩逮于今而詩書之澤始顯侍御君方持斧按粵東即林墩派而虎坵派則司理君是也滌渠公諱應麟字君德爲源孫公四世孫源孫生蘭生蘭生生昭昭生瑒爲京衛參軍是爲公父昭早世配黃氏矢節植孤惠安張襄惠公爲節孤賦表敬之參軍公貴贈父如其官母黃氏贈孺人參軍公娶謝孺人生公公性沉靜口稍蹇不能誦而善強識一笥腹中終其身弗忘業胡氏春秋又博習諸史百家語所爲文右高亢左尺幅下筆翩然若長江大河與群士對壘每一奏技衆爲閣筆鮮有和者貴溪江干坡公督閩學試及清溪得公牘竒之錄爲博士弟子嗣是督學使者至每試輒優公甲列俛受餼矣顧上省辟輒報罷公雖俛首下帷不色撓家故饒公恥爲治生計常斥青蚨買群籍盤礴沉浸其中于于然自適也邑嘗有寇警諸山居逃竄者率携金帛棹穀米以行公獨搜括載籍緘之膝囊它一無所問人或謂公公答曰此吾所嗜也古不云積書以遺子

孫乎而是時司理君已警慧斬斬露角矣警稍定戒
歸居久之乃復慨然嘆曰夫斥鷃之望大鵬坎壈之
對海若茫然自失也吾其卜宅郡會與諸才士游且
爲謀兒子地乎遂棄故廬徙郡城家焉公既宅郡城
交游靈廣公配吳孺人營其內不煩問有無多寡以
故得一意於學日群諸豪雋相淬礪切劘其意氣鋒
銳詞采空湧郡中士謝弗如也督司理君學嚴架燧
立課程夜必篝燈鷄三號輒起不憚以身率之居
恒韋布脫粟飯乃至行經師脩或饗殮供餽則竭蹶
豐腆無所靳比司理君以奇童子補文學掌故公輒
揭群籍肄之曰吾向所積以遺子孫者倘不負乎古
稱敦學半吾未爲老驥伏櫪也顧越二歲而公卒方
參軍公宦游京師凡十二年于外公與兄伯依母謝
孺人以居迤迤孝養動必稟教不敢以己意錯寸趾
吳孺人性婉順於妯娌中最得姑氏懽公念參軍公
憐愛其庶子女則與吳孺人請於母氏願加意撫視
之昇季弟田宅家僮與已埒即女弟裝送亦倍厚焉
謝孺人以鳴鳩之愛聲于閭黨中實公慈憫之也其
營二尊人窀穸率以身爲諸弟弟倡即不至行營高
厰如韓氏子顧所竭誠信傾宿儲絕無顧望意人益

以是孝公與人交披襟展窾靡設城府又不侵為然
諾不善酒雅有酒趣客至張具懽飲雅歌投壺終日
靡勸凡里中有義舉必就公詢焉其為鄉人所重如
此公之歿也司理君年甫十六耳仲季筑筑初知書
孺人茹淡攻苦課諸子如嚴父持門戶井井如也僮
僕無敢嬉田園歲賦之入無損其舊乃諸子學業亦
次第成人謂孺人克代有終矣公子三雨化長沙府
推官時化貢生春化邑廩生蓋班氏傳西漢諸儒所
編錄徒衆斌斌甚盛乃家庭間授受一何寥寥也公
業胡氏春秋以授其子讀父書者有人矣吳孺人後
龜勉以竟公志譬之樹穀然公藝之吳孺人溉之
以永賁為豐穰猶有待也公及孺人墓在南安縣三
都石鼓山之原葬以萬曆甲辰十一月二十四日銘
曰瑕丘傳業不顯其身遺子及孫令緒以振柳氏素
風貽謀翼子閨闈之教成厥終始誰其似者清溪之
林鐫詞玄堂爰播德音

鄉進士鑑泉留公暨配黃孺人墓誌銘

鑑泉留公余文社友也齒於余為長余謬徼天幸壯歲叨第久之公始舉于鄉遭廻十餘載竟不獲一第以物知公者謂大材晚成徒虛語耳今公之子孝廉君維相營葬公而屬余銘曰先君子之葬也緩敢徼惠大筆庶幾逭小子罪戾余固辭老疾而孝廉君固請曰先君子之夙交幾盡矣非得先生言誰能徵而信者余不覺惻然按所具狀皆詳覈質行不為綺語飾說乃因而次之曰公諱湛然字敦照性資爽朗瑩徹居恒稱引莊生之言曰人莫鑑於流水而鑑於止

水因以鑑泉自號云留氏自節度公忠宣公以勲德
名世稱閎閎舊矣入我朝則公曾祖諱某祖諱芳
領成化中鄉薦官某府別駕別駕長子方伯公諱志
淑季庠士守吾公諱志憲則公父也而庶母鄭氏實
生公公自成童時軀偉聲宏觀者咸曰為瑰器比就
傳習訓誥業於誦讀不甚敏而最善彊記一經腹笥
永如日閱至搆思屬筆則劃然心開藻麗旁溢即宿
儒謝弗逮守吾公異之曰得非謝氏阿玄耶弱冠遊
庠校諸庠士咸遜以推鋒每與同儕角技輒注意鑑
別洞悉妍媸汰之若蕪批粹之若綴錦種種群言胥
羅為胸中故物而出之燦然一新矣公少壯學問得
之苦心力索居多與人交久滋益恭而最所嘉樂者
尤在冲懷挹損博取為善癸酉掇科後凡再厄于春
官歸而掩扉祕處据榻匡坐惟與二三石交相遇從
劇譚天人古今旁及稗官野史問竒字而已嗣後念
尊人春秋高輒低迴不能就道有從容勸駕者第應
曰吾不忍以身外浮榮易庭闈菽水懼其最後則遭
外艱阻春試尋即賫志長往矣初守吾公席先人餘
庇纖辛殖產家儼素封屬伯子以家柄而箕裘緒業
惟公是託公亦專心力赴之絕不問田園腴瘠貲財

厚薄比尊人物當分箸一聽伯兄剝割受縮受確置
之若罔聞者素性敦樸食無重筮出鮮蒼俟自博士
諸生以迨孝廉一青布袍無二其以孝廉里居也謝
絕干請避踪偃室戶庭外闌不聞人聲惟族戚知舊
徒手丐貸者至輒延見一見輒厭所欲去如取諸外
府然以故鄉閭頌德即士紳中亦稱公內行淳備表
裏符券廷為諸人士儀表而以公之弗壽付諸天道
之不可知云公配黃孺人武榮黃洛清女黃故武榮
望族也孺人賦性婉嫕父母奇愛之自歸于公諸所
為勛勩內政咸克體公意而代有終者公事二尊人
孝孺人佐以勤慎公奉伯兄丘嫂嚴孺人佐以善下
公居身澹泊無侈奉孺人佐以節音公施與慷慨無
却容孺人佐以共惠公以經史餘閒課諸子而孺人
躬親織紵督率夜讀門以内雍雍肅肅繫惟壺範是
則諸子迄于今悲靡恃也吁可謂女士矣憶曩結社
時公於余特所推企每一篇出輒擊節讚頌不休余
亦以公為知己而公之性行敦摯文稱其質余亦竊
慕焉當公之歿也余方典南辟雍聞公訃為之潛
然哀惋云銘曰珪璋既售弗登宸陛驂駟旣騰弗列
一室遺此逐電空抱奇氣懷賢憐才永增歎愾願比

正學堂

三十一

四百六

垂後裔九原藏魄偕茲伉儷竚需哲嗣勒光崇隧

左州守文源楊公暨配翁宜人墓誌銘

進士楊君瞿唼將葬其父左州守文源公暨母翁宜人而屬銘於余余與左州公安莫逆爰銘其尊人一溪公墓矧今其敢辭按狀公諱啓新字日燦嘗改名依仁應省試儒士第一尋復其舊皆奉父命也楊之先世自不語居士徙于泉再傳生玄琦玄琦生瑩官浙江景寧學博瑩生亨亨生一坦公桓桓生一溪公宗叙是爲公父一溪公弟宗秩舉嘉靖辛卯鄉薦官終寶應令嘗過家見公而竒之曰是當亢吾宗寶應公歿家中衰而公伯兄年會已爲博士弟子一溪公

屬公服賈庶不匱二尊人旨甘一坦公固不可已而
母薛孺人歿家苦匱甚乃晝輟儒業坐市廛夜則篝
燈讀達旦比終母喪冠而娶翁宜人爲學博瑀孫女
娶之日奉一坦公命醮賈人帽以儒冠往既竣事則
冠賈人帽如故久之翁宜人謂公曰世有儒服而賈
行者今廼儒行而賈服耶冠服無論第儒業其勿輟
每夜必焚膏佐公讀而自力女紅以供菽水歲辛酉
公應省試乃自喜曰吾今始稱儒服乎是時倭寇充
斥掠行人索贖而公伯兄陷焉一坦公與一溪公匆
逼怔營戒家人勿傳言亂仲意宜人捐簪珥助贖金
而密寄聲趣仲還公聞報星奔迂失道宿一山巔不
老人進粥夜覆以衣曰第安睡明向山後行無恙黎
明不知老人所往公如言援垂藤下知倭方徙巢而
前迂迴跋涉備諸險厄狀比抵家伯兄前一日出矣
二尊人且喜且詈謂婦幾失吾仲仲幾喪父母遺體
然族鄙謂公與宜人咸篤摯性以故天亦篤之祐云
公自是攻苦勤業不問家宜人力持其內厚奉尸糈
薄營俯育皆黽勉爲之不以貽公憂而公文聲日起
諸鉅家授室弟子執經者爭願得公若郕呂然至試
棘闈輒不利迨己卯薦賢書則年三十九矣再上春

官不第念一溪公老須祿養強就教于兗州之滋陽
謂宜人素孝謹能安舅氏七筋則留宜人于家居二
載餘會進士君領鄉薦携以上春官又不第是秋聞
一溪公訃則擗踊大慟曰嗟天乎不孝為祿養仕而
父又不祿也歸而執喪營葬心力畢殫嘗遘疾幾殆
服闋赴銓得增城學諭屬新安令缺公署之與其民
約法三毋逋稅毋爭毆毋為盜民服公不苛峻遂奉
約束惟謹邑產毒草俗輕生奸賴風熾公嚴為之禁
有犯者必罪不貸澆風為頓戢時宜人從在宦邸公
退食語之曰吾活人多矣即三槐可植矣公困青蘧
十載膺薦五董得遷海門令令海門未久為直轄
誣詆謫丞東莞自東莞遷今武宣自武宣遷左州守
公性疆執海門多豪猾乘江坍之餘匿尺籍飛詭為
疲民害又伺兩造短長竊長吏權而操縱之以邀重
賄公廉得其狀所清覈捕治甚肅竟為所中以去垂
橐蕭條至僑寓武林假貸以給無悔也東莞故稱腴
公嘗署邑篆又嘗署新安龍門香山諸邑所振刷拊
循備勞瘁更劇而矢心寒素如初諸子或省覲告歸
第出所餘俸薪畀之曰視胡質一縑侈矣武宣貢賦
半出徭夷其居民迂與代輸而賺匿之逋負莫可究

詰公召徭人諭之若輩皆令赤子也邑庭供輸何其
而假手爲徭人踴躍懽呼自是貢賦如期無煩督促
公既稔知徭俗恒心籌竊嘆曰治絲而棼之則今日
處徭夷之謂耳彼非吾人哉時喜事者議乘其相攻
勒兵勦之公力爭得止復議於潯江之界設營兵加
邑賦召募公又力爭之得止邑中百工瀟然籍資于
東客而奸民目爲財藪則借寇盜恫喝之夜焚東客
門籬聲言盜發然實無盜公訶知其主名捕聞諸上
官而置之罪蓋其苦心綏輯類如此公宦既不達又
以清白自將糲飯布衣無室謫比遷左州則瘴重而
俗夷宜人意難之請與偕隱公默然遂相携往左州
統三十六鄉鄉各有豪家主之轄其土田役屬其人
民即殺之無敢問公痛繩以國法雖任怨弗顧也歲
例幫南太二郡兵餉以民夷牙錯區畫靡定公極力
劑量著爲籍民甚稱便中丞臺以安南調兵叙公功
得欽賞紀錄公方悉心經畫圖以丕變夷風而遽病
不起矣公自典教增城後宜人皆從在邸中諸凡嚴
扃鑰飭僮僕皆無煩公顧慮進士君休沐里居聞訃
疾馳奉宜人扶輓旋里抵漳南而宜人語諸婢曰萬
里孤魂長途多梗今至此吾事畢矣抵里甫半載而

卒公享年六十有七宜人享年六十有八子三人
峽原名載萼丁未進士次載豐次載茲皆郡庠生公
及宜人墓在臨漳門外洋嶼山即公大父一坦公所
葬處也先是一坦公暨配黃孺人以萬曆丁丑年正
月初三日葬于茲山進士君圖襄事未獲吉念一坦
公墳樹它典常於邑悲傷推尊人意挈金贖還是夜
一坦公見夢質明詣墳左得佳穴焉遂決意營玄宅
於萬曆己酉年十二月廿五日奉公及宜人柩以葬
公守官食貧偃蹇以歿足令人扼腕然而家聲世業
有振之者矣棟銓者置公於瘴鄉逖壤而公所居樹
德所去見思左州人祠公名宦與桐鄉遺愛媲美
人有言曰身為廉吏婦又及見子之成苦貧不祥言
哉言乎銘曰佑善者天券契若懸不畀諸其身而償
諸嗣賢直道者人衡鑑司存不揭於典銓而行於斯
民不足為者廉吏最可為者廉吏妻既齊德子非負
薪其餘光且賁於九地

累封承德郎工部主事纓泉蔡公墓誌銘

纓泉蔡公吾師沙塘先生之伯兄憲副誠中君之父也。不佞既著錄師門，又夙慕公長厚，不敢以均敵禮事公。而游于憲副君最密也。憲副君官粵蜀，念公春秋高，將圖為歸養，請公叱曰：「行也，而身今猶屬而父耶。」憲副君束裝之官，以入賀，且歸省覲，而公弗待矣。公仲子國燈當應京闈試，以不欲並去膝下，尼不行。奉公終，無憾。廼憲副君猶不勝忉怛言之淚淋漓墮也。襄事有期，謁不佞，請銘公墓，而以吾師命將之。不佞安敢以不文解。廼按公壻州刺史翁君所為狀志。

之曰公諱一桂字景培宋端明學士忠惠公襄之裔也忠惠公居莆再傳爲龍圖學士佃徙安吉又再傳爲進士夙歸徙晉江四傳爲處士革始居沙塘濯纓里十四傳爲金牛丞彌凱公曾祖也彌凱生鄉賓聰聰生贈承德郎戶部主事珪是爲公祖若父戶部公卜徙筍江公自號纓泉志不忘本始云公慧穎絕人讀書過目輒成誦與沙塘先生時稱雙壁公游庠泮而沙塘先生總州領鄉薦六上春官率曠歲廼一奉定省公身任家督帶經力穡奉戶部公暨母葉安人旨甘而是時憲副君已軒然呈異質公喜曰孺子可教也延師授經昕夕躬課督甚厲不專自治業矣嘉靖戊午夏里中駭倭則徙二尊人及陳安人邑里而身治業于祖塋次且督輸輓會寇至挺身宵遁且行且伏蓋浹旬始達二尊人側不自言瘁也翌歲沙塘先生成進士其秋戶部公捐賓客越一歲葉安人棄柩棧時公已卜宅城西偏宗戚避寇者赴公如鱗集公屢勉拮据而存問其疾苦無勸色寇平卜北雷山則揭家聚廬兆左而課兒講業于波藥子亭又時時課僮行田園蓋錢鏄鉉又與勝囊泓穎無一日不在目中矣或謂公有貴介弟兩郎又國寶直幕天席地

恣意所適奚田舍而問家人產爲公嘆曰夫謂不佞
藉介弟庇遂迺彌彌其逸哉凡逸必汰汰必匱且勞
之徵逸約之徵汰如流耳逸之徵勞汰之徵約猶既
太牢而澆之藜藿也凡吾所爲量守故轍嘗淡啖辛
非直以成弟廉也即兒而更不可知者它日而又或
以教兒廉也大都公所程督二子率知艱稼穡躬習
荼苦非直涉獵文囿焉已憲副君起家爲令以戴星
茹檠著循良聲則公之教蚤矣憲副君今奏績陟司
水衡再馳綸命上纓弁歲不再御緋衣革鞜贗袍素
被終其身弗改比憲副君擢爲天官郎稱貴倨矣公

蓋自韜歛與臺賤旅嘔愉下之幽居一榻榻前一几
課少子揚榘今古諸閭井請謁事盧兒夙奉厲禁靡
敢有郵傳者暇時與子姓弟兄譚農殖桑麻壘壘竟
日間及典章沿革墳籍子史語若懸河又皆諄諄規
切語公雖卧榻中諸子孫屬耳垣戶咸縮舌如奉提
誨每郡邑大夫干旌及門輒辭以疾不敢見亦未嘗
馳一刺報謝焉所卜宅不競喧所買產不競腴工作
僮役受指閭外型土牡鑰師心獨營即陞隧濟畝揮
畫數十里外不異躬歷蓋公有心計而精力彊敏饒
運幹之輪寘不飾而堅租稅不督而集登鬻廢著無

藉憲副君祿入而充然有以遺憲副君者晚年構濯
纓宗祠立戶部安人祭田不爲費止又且以次構祠
戶部至鄉賓金牛丞公邇上更爲祭田若干迺志未
就而仙逝矣公至性孝謹戶部公有所納妾携其二
子以來頻鷓鴣戶部公比卒又私其橐中裝公置弗
問敬之歿身而撫其二子如公存葉安人憐愛諸女
公曲爲推解存問弔卹恒先意當母心竟公身弗懈
諸葉詣公公飲食勞問如平生急則倚公如左右手
而前母李安人爲魚憲墀女弟公視諸李一如諸葉
子女姻字凡再屬焉曰母忘父戚也老而念二尊人
弗置諸子以七十稱觴猶惻然不欲執爵其篤行
如此公壽七十有九公配陳安人以公再封之年由
孺人晉今封子男三長即憲副君國炳萬曆甲戌進
士累今官次國燈國子生俱公配陳安人出次國煒
邑庠生妾周氏出陳安人出憲副君卜公兆于邑三
十二都沙塘盛雲山之原距濯纓祠西數十百武公
志也葬以今戊戌冬十二月初九日銘曰玉韞于璞
劔發其銛雖則弗售厥光熒煌引繩爲平折矩爲方
惟其有之楷式不亡濯纓故山雲樹蒼蒼粉社永念
登舟斯藏神所憑依卜云允臧崇隆馬鬣慶澤彌昌

郡庠生騰江田君暨配王孺人墓誌銘

田茂才君諱雲龍字德從吾母舅文學王公獻之壻也舅氏以麟經名里中壻惟君甥惟余不佞皆素所期許謂足光門闈徵宅相者也顧吾兩生者未嘗用藝文而屬鞭弭嘉靖之季郡中倭患君與吾舅皆家南城外之登瀛里舅氏挈其家竄城中先中允府君母太安人避正舍居之而姪氏與女田孺人從焉是時孺人歸于君已十載伯子居中在抱矣日坐小樓勤織桑昕夕靡懈雖隔藩比宇聞不聞聲吾太安人每責噴稱之以為婦氏法比寇平乃趣裝還里而歲

時念吾太安人問餽不絕余與君交亦日益親間或
譚文服君得最上乘也君體不勝衣履必擇地臨事
不以喜愠見色余少於君六歲既幸超乘出君猶久
滯黌序試輒居高等而輒頌棘闈居貧授生徒自給
至以餘力營治生計又輒與時左賴孺人典其內政
佐以勤嗇凡祭祀賓朋兒女冠笄婚嫁之費皆手所
拮据君十九在外十一在內不憂貧亦不憂困阮意
氣恬如也嘗携篋趨建業已復壯遊燕都時余佐春
官聞君至喜甚即延君為兒子師而同官蜀人李少
宗伯遣其子今庶吉士胤祥稟學焉李宗伯少年高
第雅自負每對君講藝輒爾心屈以師資得人為其
子慶間戲謂余曰劉延明豈遽讓魏陽元而浮沉至
是耶余咲而頷之余自春官乞休歸君同舟南下或
舟中對酌不能罄一杯至其從容譚說則上下古今
貫穿經史若鼓洪濤飄玉屑殊令人心醉也君慈祥
醇謹為鄉人所愛慕有二子能讀父書伯子應選貢
叔子有聲于庠校人咸以封君期之君恂恂偃僂益
恭諸父老僉謂之長者共推主里中正有搆必就質
君為諭解即為君所短無弗心折者會權稅事起諸
牙僧蟻聚蠅營請繁征下逮蔬菜且謀及汎舟之役

業有成議矣君聞之喟然曰吾泉土瘠民稠仰哺吳浙若征及海艘穀米恐諸奸漁獵商人阻畏是重困吾赤子也官司亦何利之有遂陳贖于邑令極言其不便甚悉令太倉顧公是之議遂寤閭黨歛然頌德夫以君之留情素梓若是假令膺民社寄所為黔蒸造命豈有涯哉然仁人之言其利溥君庶幾近之顧弗獲逮子之養孺人之於養也逮矣而遽溘爾長終嗟乎天之不可問也居中營葬其父母獲吉于邑三十五都獅山之右卜萬曆某年某月某日襄事先期持行狀以墓銘見屬曰知吾父母者莫如先生願惠賜一言俾垂不朽余閱狀三復陽然有渭陽之感矧其為德于鄉式穀于子又足稱也為之銘曰魏有子方國稱仁人漢有田何傳經不堙君其裔耶焯矣等倫緒衍箕裘德洽里隣勒詞貞石以賁幽垠淑配同藏雙壁嶙峋